

**TADAU-MINGGU' KODUVO NGOOPOD OM APAT
ID TIMPU' TOOMOD
TOUN B**

15 - 9 - 2024

I KRISTUS, II TANAK DO TUHUN

Sumamba tokou dii tuhun i Kristus, ii minonoimo do potitikid komungkangan do koozuvo' dotokou do tuhun, minamazada' Dau' sondii' om minanaan dii salip.

HOZOU KOSUANGAN

Cf. Sir 36:18

Panaak do pibabasan, Oi Tuhan, doid sontob dii mandad Diau, do ii profeta ngaavi' Nu o'ium do otopot. Kinongoo' ii sambayang ngaavi' di suupu Nu, om tuhun Israel ngaavi' Nu.

SAMBAYANG-TONIIBO-KOPONIMPUUNAN

Intong doid dagai, Oi Kinoingan, Mamamangun om momomolinta' do saviavi' konunu, om, do opiumanan nodaa dagai ii kalaja' do kosianan Nu, panaak no do sumuupu zikoi nodaa Diau miampai aavi' ginavo za. Maza' di Tuhan za Jesus Kristus, Tanak Nu, ii mamaamasi om momolinta' miampai Diau id dii kopiisaan di Spiritu Tobitua, Kinoingan, montok sohihinaid aiso kopupuson.

S. Amen.

PAMBASAAN KOISO'

Pambasaan mantad di profeta Isaiah 50:5-9

Noukab di Tuhan o tohingó ku.

Izou nopo do dau', nga' au' zou i' guminaga',
au' zou nogi' minogidu'.

Pinataak ku ii hikud ku doid dii minomobog ngaavi'
dogo',

ii pingas ku doid dii minamagamu ngaavi' do dangut
ku;

au' ku tinakapan ii voos ku
do mantad kopoimamangan om duha'.

Mikot i Tuhan do manakadai dogo',
mooi do au' zou akama' dii kopoimamangan ngaavi'.

Ingkaa no, ponogi', potoundaon ku ii voos ku
miaga do hakang-vatu;

koiho zou do au' zou i' mai' poikumon.

Ii pokotopot dogo' doiti' id somok ku.

Kivaa naku isai noopo monimpuun do kopombisalaan
ngaavi do humavan dogo'?

Dadi' kanou mugad songovian doid pombisalaan.

Isai momusoou do kivaa ahal dau do pamahavan dogo'?

Poinsomoko' isido Dogo'.

Mikot i Tuhan do manakadai dogo',

isai katama' mongukum dogo'?

Ii boos di Tuhan.

S. Kotohuadan doid di Kinoingan.

HOZOU KOSIMBAAN

(HOZOU-KAPAAZAAN KO-114:1-6. 8-9.R.V.9)

S. Mamanau zou i' id dumbangan di Tuhan, id dii tana' di songimpasi.

toi' Alleluia!

1. Guminavo zou di Tuhan tu' nokoongou Isido dii haad dii kopokiinsianan ku; tu' pinoumbangan Disido ii tohingo Dau' doid dogo' id dii tadau ontok minomohoou zou Disido. (S)
2. Hiniputan zou dioho', ii tingkava' ngaavi' do kapatazon, miampai dii koundasaan-toindamaan dii kahabangan; ginakom zou dioho', katangaban om koundasaan-ginavo. Minomohoou zou doid dii ngaan di Tuhan. Oi Tuhan Kinoingan ku, pagabaso' zou! (S)
3. Songkuo vinasin' di Tuhan, om otuhid; i Kinoingan dotokou kivaan kobinsianan. Umohigan di Tuhan ii ginavo ngaavi' tohuduk; aiso haid lompu ku dadi' tinampasi zou Disido. (S)
4. Nopi' Disido mantad kapatazon i koduuduvo ku, ii mato ku ngaavi' mantad lomou ngaavi' om ii hapap ku mantad kasadu. Mamanau zou i' doid dumbangan di Tuhan id tana' dii songimpasi. (S)

PAMBASAAN KODUVO

Pambasaan mantad dii suat di Sangti James 2:14-18

Onuo ii ahal, oi tobpinai ku ngaavi', do songuhun ii au' insan nokoimang do tongoiso' koimaan tavasi' nga' magampa do kivaa kotumbazaan dau'. Manampasi i' dii naku disido ino kotumbazaan? Nung songuhun dii tobpinai-kusai ngaavi' toi' songuhun dii tobpinai-tondu' ngaavi' o momoguno do basaan ngaavi' om au' kogonop o takanon do akanon do masi, om songuhun diozu moboos doid dioho', 'Osoosogit ko no daa; mintibung no kozo om makan no toguugumu', miampai do au' i' manaak dioho' diti kaganapan ngaavi' kiguno kozo montok do koposizon, dadi' nunu nodii o kovasian dino? Kotumbazaan nopo nga' miaga no dino: nung au' mipahud dino o kalaja' tangavasi', nga' poimpatai i' ii.

Itia o lahan do moboos doid tuhun ngaavi' miaga dino: "Moboos ko do kivaa kotumbazaan nu om kivaa koimaan ku tangavasi'; patahangon ku doid diau do kivaa kotumbazaan ku maza' do popokito zou diau do koimaan ku tangavasi' – dadi' patahango' nodii doid dogo' do kivaa kotumbazaan nu miampai do aiso i' toombo noopo o koimaan tangavasi' do pokitanan.

Ii boos di Tuhan.

S. Kotohuadan doid di Kinoingan.

KAPAABALAN DII ABAL-TAVASI'

Jn 14:5

Alleluia, alleluia!

Izou no ii Lahan, ii Katapatan om ii Koposizon, ka di Tuhan; aiso songuuhun kaanu mikot doid di Tama' nga' maamaza' no Dogo'.

Alleluia!

toi'

Gal 6:14

Alleluia, alleluia!

Ii nopo aanu ku do mokiazou nga' ii-ii no salip di Tuhan dotokou, maza' dii no o pomogunan do kapapak doid Dogo', om Izou doid di pomogunan.

Alleluia!

ABAL-TAVASI'

Pambasaan mantad dii Abal-tavasi' tobitua sinuat di Mark 8:27-35

I Jesus om ii mokiki'ia' ngaavi' Dau' tuminongkizad kuminaa' doid kokompungan ngaavi' poinhiput do Caesarea Philippi. Id tindahanon pino-uot Disido itia tudizo' doid dii mokiki'ia' ngaavi' Dau', 'Isai Zou ka do tuhun ngaavi' do Izou?' Om pinoiho dioho' Isido, 'I John Baptist,' ka dioho' do minoboos 'ii suvai ngaavi' nopo nga' i Elijah; ii suvai ngaavi' nopo vagu' nga', songuhun dii profeta ngaavi'.' 'Nga' iziozu,' ka Disido do minuot 'isai ka diozu do Izou?' Poboos no i Peter om minoboos doid Disido, 'Iziau no ii Kristus.' Om

minanaak Isido do ponuu' ngaavi' do kada' popoiho diisai-isai kokomoi Disido.

Om tuminimpuun Isido do mongia' dioho' do ii nopo Tanak do Tuhun nga' pinasandad no haid do mundoso do oindamaan kozo, do zadaan dii moomohoingon om dii huguan ngaavi' padri' om dii tangabaa-adat, om pokoozon doid kapatazon, om katahib po o tohu tadau do tumungag vagu'; om noboos Disido saviavi' diti do uha-uha' o binuhat. Dadi', ovito po di Peter Isido do minimang pidan, tuminimpuun i Peter do monongkiuva Disido. Nga', kiskus po om do poingintong di mokiki'ia' ngaavi' Dau', hodongo' no Disido i Peter om minoboos doid disido, 'Kaa' doihuu' id douvi Ku, oi Satan! Tu' ii nopo lahan Nu do momusoou nga' okonko' doun Kinoingan do lahan nga' doun tuhun i'.'

Hinoou Disido ii tuhun ngaavi' om ii mokiki'ia' ngaavi' Dau' doid Dau' om minoboos, 'Nung kivaa isai noopo ii mimang do dumadi do tutumanud Dogo', pazadao' no isido do dau' sondii' om saanon no ii salip dau' om tumanud no Dogo'. Tu' isai noopo ii mimang do manampasi dii koposizon dau' nga' atagakan i' dii; nga' isai noopo ii atagakan dii koposizon dau' sabap no Dogo, om sabap dii abal tavasi', nga' kapanampasi i' dii.'

Ii Abal-tavasi' di Tuhan.

S. Kaazaan doid Diau, oi Tuhan za, Jesus Kristus.

Booson ii Otumbazaan zou.

SAMBAYANG DO ID DII TITAAK NGAAVI'

Intong miampai kaanangan do id kopokiinsianan ngaavi' dagai, Oi Tuhan, om id kovosian Nu toimoo' no iti ngaavi', taak ngaavi' di suupu ngaavi' Nu, do nunu o nataak do tosoosonguhun kumaa' doid kapamantangan do ngaan Nu tumompson nodaa dii kopomasizan do saviavi'. Maza' di Kristus Tuhan za. S. Amen.

PREFACE KO-VIII DO MINGGU' NGAAVI' ID TIMPU' TOOMOD

I Eklizia nosompoo dii kopiisaan di Kointohuvan-tobitua

Totootopot do kotunud om otuhid iti, kalaja' za om kopomasizan za, tomoimo om id-nombo-noopo do manaak Diau do koponongkotohuadan ngaavi', oi Tuhan, Tama' tobitua, Kinoingan tavakas-kozo om aiso-kopupuson.

Tu', ontok ii tanak ngaavi' Nu nokotogizas mogiinsoosodu' maza' do douso, maza' dii Zaa' di Tanak Nu om dii kuasa' di Spiritu, tinimung Nu vagu' izioho' doid Dau-sondii', do tuhun ngaavi', otuidong sabaagi iso' maza' dii kopiisaan di Kointohuvan Tobitua, minonodo dii tinan di Kristus om dii panambazangan-tagazo di Spiritu Tobitua, kointahang nodaa, doid dii kaazaan do kabaahan Nu mogihahapau, sabaagi do i Eklizia.

Om ingkaa no, id kopikouvangan miampai dii tinimungan-ngaavi-huhumozou do Tasab ngaavi',

mangazou zikoi Diau, om miampai kaandasan papaabal zikoi:

Obitua, Obitua, Obitua....

HOZOU KOSOMBUTAN

Ps 35:8

Songkuo nodii pinagon-hoogo do kosianan Nu, Oi Kinoingan! Ii tanak ngaavi' do tuhun ngaavi' mogium susuton id dii tinggohungun do pahapa' ngaavi' Nu.

toi'

Cf. 1 Cor 10:16

Ii sasavan ii balakatan za nopo nga' kopiisaan id dii Zaa' di Kristus; om ii louti ii kokibon za nopo nga' koihangan-baagi id dii Tinan di Tuhan.

SAMBAYANG OPONGO KOSOMBUTAN

Ii kalaja' diti taak poinsurga, Oi Tuhan, sumambayang zikoi, manansanganu nodaa do pomusaavan ngaavi' om tinan ngaavi' dagai, mooi do ii vaza' ngaavi' diti, om okonko' hizab ngaavi' dagai sondii', tomoimo nodaa do muubuzu' mompus-ompus id dagai. Maza' di Kristus Tuhan za.

S. Amen.

BALAKAT

Ii balakat di Kinoingan tavakas-kozo, i Tama', om i Tanak, ✠ om i Spiritu Tobitua, sumondot nodaa do id diozu om tumimpoon miampai diozu sohihinaid.

S. Amen.